

Հայաստանի Հանրապետությունում խմելու ջրի մատակարարման ոլորտում իրականացվող սակագնային քաղաքականության մասին

Խմելու ջրի մատակարարման ոլորտում սակագնային քաղաքականությունն իրականացվում և սակագները սահմանվում են ՀՀ հանրային ծառայությունները կարգավորող հանձնաժողովի (այսուհետ՝ Հանձնաժողով) կողմից: Սակագների սահմանման ու վերանայման գործընթացը, սակագնային համակարգի մշակման սկզբունքները կարգավորվում են [ՀՀ ջրային օրենսգրքով](#) և Հանձնաժողովի որոշումներով հաստատված կարգով և մեթոդիկաներով ([02.11.2016թ. N296Ն](#), [09.12.2016թ. N397Ս](#), [05.04.2005թ. N33Ն](#)): Ներկայումս խմելու ջրի մատակարարման և ջրահեռացման (կեղտաջրերի մաքրման) ծառայությունների մատուցման լիցենզիա ունի և Հանձնաժողովի կարգավորման դաշտում է գտնվում [«Վեոլիա Ջուր» ՓԲԸ-ն](#):

Հանձնաժողովի կողմից խմելու ջրի մատակարարման ոլորտում սակագնային քաղաքականությունն իրականացնելիս նախատեսված է երկու մոտեցում:

Առաջին մոտեցում: ՀՀ կառավարությունը «Երևան Ջուր», «Հայջրմուղկոյուղի», «Լոռի-ջրմուղկոյուղի», «Շիրակ-ջրկուղկոյուղի» և «Նոր Ակունք» ՓԲԸ-ների կողմից օգտագործվող ու պահպանվող ջրային համակարգերի և այլ գույքի օգտագործման իրավունքը վարձակալությամբ փոխանցելու նպատակով մրցակցային երկխոսության ընթացակարգով կազմակերպել է վարձակալի ընտրության միջազգային մրցույթ, որի արդյունքներով հաղթող է ճանաչվել ֆրանսիական «Վեոլիա Օ-Կոմպանի Ժեներալ Դեզ Օ» ընկերությունը ([ՀՀ կառավարության 27.10.2016թ. №43-24 արձանագրային որոշում](#)): Նշված ընկերությունը Հայաստանի Հանրապետությունում հիմնադրել է ինքնուրույն իրավաբանական անձ՝ «Վեոլիա Ջուր» ՓԲԸ-ն, որի հետ կնքվել է 15-ամյա վարձակալության պայմանագիր: Մրցույթի արդյունքում ձևավորվել են 15 տարվա բազիսային սակագներ, որոնք համաձայն «Վեոլիա Ջուր» ՓԲԸ-ին տրամադրված խմելու ջրի մատակարարման և ջրահեռացման (կեղտաջրերի մաքրման) ծառայությունների մատուցման լիցենզիայի պայմանների՝ վարձակալության 2-րդ տարվանից սկսած յուրաքանչյուր տարի պետք է ճշգրտվեն՝ հաշվի առնելով հետևյալ երեք գործոնները.

- 1) մանրածախ ջրամատակարարման ծավալը,
- 2) սղաճը,
- 3) «Վեոլիա Ջուր» ՓԲԸ-ին մատակարարվող էլեկտրաէներգիայի սակագների փոփոխությունը:

Միևնույն ժամանակ, յուրաքանչյուր տարվա ճշգրտվող սակագները նվազեցվում են նաև «Վեոլիա Ջուր» ՓԲԸ-ի կողմից ջրային համակարգն այլ նպատակներով օգտագործումից և

խմելու ջուրը ոռոգման նպատակով մատակարարելուց ստացված լրացուցիչ հասույթին համապատասխան:

Բազիսային սակագների ճշգրտման մեխանիզմը, հաշվարկի ձևը և ներկայացման գործընթացը նկարագրված է [Հանձնաժողովի 09.12.2016թ. №397Ա որոշմամբ](#) հաստատված «Վեոլիա Ջուր» ՓԲԸ-ի խմելու ջրի մատակարարման և ջրահեռացման (կեղտաջրերի մաքրման) ծառայությունների մատուցման լիցենզիայի պայմաններում (Հավելված №3. «Սակագներ և սակագների ճշգրտումներ»):

Երկրորդ մոտեցում: [Հանձնաժողովի 05.04.2005թ. №33Ն որոշմամբ](#) հաստատվել է խմելու ջրի մատակարարման, ջրահեռացման և կեղտաջրերի մաքրման ծառայությունների մատուցման սակագների մշակման մեթոդիկան, որը կկիրառվի խմելու ջրի մատակարարման և ջրահեռացման (կեղտաջրերի մաքրման) ծառայություններ մատուցող այն անձանց նկատմամբ, որոնց Հանձնաժողովի կողմից կտրամադրվի համապատասխան լիցենզիա և չի կիրառվի սակագների ձևավորման վերը նշված առաջին մոտեցումը կամ նմանատիպ այլ մոտեցում: Հանձնաժողովի 05.04.2005թ. №33Ն որոշմամբ հաստատված մեթոդիկան սահմանում է, որ սակագների մշակման գործընթացն իրականացնելիս պետք է առաջնորդվել անհրաժեշտ տարեկան հասույթի ապահովման սկզբունքով, համաձայն որի անհրաժեշտ հասույթը բավարարում է իրականացնելու ջրամատակարարի հուսալի, անվտանգ և շարունակական գործունեության համար պահանջվող բոլոր գործառնական ծախսերը և ապահովելու ներգրավված կապիտալի դիմաց ողջամիտ շահույթը: Ընդ որում, ջրամատակարարի ակտիվների ֆինանսավորման աղբյուրներից, պայմաններից և հնարավորություններից ելնելով՝ թույլատրելի շահույթի որոշման համար նախատեսված է երկու եղանակ՝ զուտ ակտիվների շահույթի նորմայի եղանակ և անհրաժեշտ ֆինանսական ծախսերի հատուցման եղանակ:

Խմելու ջրի մատակարարում և ջրահեռացում (կեղտաջրերի մաքրում) իրականացնող անձի կողմից ստացվում են ֆինանսական և տեխնիկատնտեսական ցուցանիշների վերաբերյալ հաշվետվություններ, որոնք վերլուծվում, ամփոփվում և հրապարակվում են [Հանձնաժողովի ինտերնետային կայքում](#):

«Վեոլիա Ջուր» ՓԲԸ-ի կողմից խմելու ջրի մատակարարման և ջրահեռացման (կեղտաջրերի մաքրման) ծառայությունների մատուցման սակագները սահմանված են [Հանձնաժողովի 22.11.2017թ. №499Ն որոշմամբ](#): Միաժամանակ, [ՀՀ կառավարության 21.12.2017թ. №1697Ն որոշմամբ](#) «Վեոլիա Ջուր» ՓԲԸ-ի կողմից բաժանորդներին մատուցվող մանրածախ ծառայությունների մատով նախատեսվել է սուբսիդիա:

«Վեոյիա Ջուր» ՓԲԸ-ի կողմից մատուցվող ծառայությունների սակագները և հիմնական ցուցանիշները

№	Անվանումներ	Չափի միավոր	Մեծությունը	Սուբսիդիայի չափը	Բաժանորդներից գանձվող սակագինը
1.	Ընդամենը բաժանորդներին մանրածախ ծառայությունների մատուցման գումարային սակագին (ներառյալ ԱԱՀ-ն), որից՝	դրամ/խմ	191.414	11.414	180.0
1.1	Խմելու ջրի մատակարարման ծառայության մատուցման համար	դրամ/խմ	162.702	9.702	153.0
1.2	Ջրահեռացման (կեղտաջրերի մաքրման) ծառայության մատուցման համար	դրամ/խմ	28.712	1.712	27.0
2.	«Կարեն Դեմիրճյանի անվան Երևանի մետրոպոլիտեն» ՓԲԸ-ի ստորգետնյա ջրերի հեռացման ծառայության մատուցման սակագին (ներառյալ ԱԱՀ-ն)	դրամ/խմ	11.114		
3.	Ջրամատակարարման և ջրահեռացման (կեղտաջրերի մաքրման) ծառայությունների մատուցման լիցենզիա ունեցող այլ անձանց, ջրամատակարարման և ջրահեռացման ծառայություններ մատուցող համայնքներին, համայնքային բյուջետային հիմնարկներին և ոչ առևտրային կազմակերպություններին մեծածախ ծառայությունների մատուցման սակագներ՝	-	-		
3.1	Խմելու ջրի մատակարարման մեծածախ ծառայության մատուցման սակագին (ներառյալ ԱԱՀ-ն)	դրամ/խմ	38.282		
3.2	Ջրահեռացման մեծածախ ծառայության մատուցման սակագին (ներառյալ ԱԱՀ-ն)	դրամ/խմ	19.141		
4.	Մակագներն ուժի մեջ մտնելու ամսաթիվը	-	01.01.2018թ.		
5.	Ընկերության անհրաժեշտ տարեկան հասույթ (առանց ԱԱՀ-ի)	մլն դրամ	19 487.33		
6.	Մանրածախ ջրամատակարարման բազիսային ծավալ (2-րդ պայմանագրային տարի)	մլն խմ	127		
7.	Ջրամատակարարման համակարգին միացած բաժանորդների քանակը 2017 թվականի դեկտեմբերի 31-ի դրությամբ, այդ թվում՝	բաժանորդ	770 244		
7.1	բնակչություն	բաժանորդ	734 813		
7.2	բյուջետային	բաժանորդ	3 466		
7.3	այլ	բաժանորդ	31 965		
8.	Ջրահեռացման համակարգին միացած բաժանորդների տոկոսը՝ ըստ հեռացվող և սպառվող մանրածախ ջրի ծավալների հարաբերակցության (2017 թվական)	%	82.2%		
9.	Հավաքագրման տոկոսը 2017 թվականին	%	91%		